

## Persona sospecha di hit and run, causando e morto di un persona, a keda deteni

Ayera diamars den oranan di merdia, diferente medio local a reporta e detencion di un dama na Primavera, caminda autoridadnan a yega despues di a haya un auto kima na Wela. Cuerpo di Polis ta investigando si e auto ey e cual a keda confisca ta esun cu a causa e accidente.

Despues di e rapport di un medio local informando cu a haya un auto kima na Wela, autoridadnan a bay te un cas na Primavera pa detene un persona e cual ta bao sospecho di a causa un accidente diadomingo ultimo den oranan di marduga na Paradera na unda un muhe 35 aña a perde su bida. Den e cas a haya un auto cu ta contene caracteristicanan similar na esun cu a comete e accidente y na esun cu a kima e cual a ser confisca.

Cuerpo di Polis mediante un comunicado a indica cu e persona di inicialnan A.C.C.D di nacionalidad Venezolano di 30 aña a keda deteni den conexion cu e investigacion cu ta tumando luga pa loka ta e accidente fatal di diadomingo ultimo.

Ademas, nan a afirma cu nan no ta descarta mas detencion relacion cu e caso aki.



### E caso

Diadomingo den oranan di madrugada un persona a ser alcanza door un auto causando un accidente basta fuerte e cual a resulta den e morto di e persona aki cu tabatin 35 aña, dialuna ultimo halto comisario Ramon Arnhem a urgi na e chauffeur pa entrega su mes.

Segun comunicado di Cuerpo Policial a indica, e informacion ta cu diadomingo madrugada pa 01:10 Central di Polis a haya notificacion di un accidente na altura di Shiribana Bar & Restaurant na Paradera.

E prome informacion ta cu un auto lo a alcanza un señora riba un e-bike (step).

Central a despacha un patrulla cu maximo urgencia y na yegada di e patrulla ta bin topa cu un señora ariba

caminda cu no tabata duna señal di bida. Patrulla ta pidi ambulance cu maximo urgencia y ora ambulance cu e personal a yega, nan a haci nan maximo esfuerso pero lamentablemente no por a haci nada mas pa e señora.

Doctor Valkuil ken ta fungi como Dr. forensico a presenta na e sitio y a constata morto di e señora Julieth Patricia Patiño Castro naci 15 november 1988 (35 aña) na Colombia. Departamento di trafico a presenta pa haci nan investigacion.

### Alto Comisario a pidi chauffeur cu a causa accidente fatal pa entrega su mes

Dialuna ultimo, prome cu e detencion di ayera diamars a tuma luga y mediante un declaracion, halto comisario di Polis Ramon Arnhem a sigura cu “esaki ta inaccepta-



bel” caminda e chauffeur no a para ni a brinda yudansa na e victima y a bandona e sitio. “Mi ta haci un apelacion na e chauffeur pa entrega su mes na un di e wardanan di polis” alto comisario Arnhem a menciona.

Ademas a bisa cu “Si un persona tin conocimiento di ken a comete e crimen aki y ta yudando nan pa sconde of drecha nan auto y/of bo ta haci algo pa stroba e investigacion, a bo tambe ta culpabel. Tuma bo mes den sapato di e famia cu a perde nan ser ker. Pone man na bo curason y bin dilanti. Si kier denuncia of informa riba algo por yama na tipline di Polis 11141,” a sigura.

### Colecta pa hiba su restonan pa Colombia

Segun informacion ofreci pa e radio emisora local CalienteFM ayera den oranan di

mainta, e victima fatal tabata bayendo su cas despues di a sali for di su trabou, na un hotel, e tabata mama di tres yiu cu ta biba na Colombia y tambe a informa cu e tabata esun cu tabata duna sosten economico na su famia.

Famia, amigonan y conocidonan ta devasta cu e noticia aki ya cu nan ta bezig pa colecta fondonan pa e gastonan funerario y asina hiba e restonan di e victima pa Colombia, pero tambe mester busca un ayudo economico pa e tres yiu cu e persona a laga na su pais di origen.

A bira conoci cu a cuminsa un colecta colocando box na diferente negoshi rond di e isla como por ehemplo: Fruteria Santo Domingo, na radio CalienteFM, Espiga de Oro, Fruteria Virgilio, Carniceria Central y Restaurant La Granja na Playa.

## A traspasa ministerio di Enseñansa y Deporte pa minister demisionario Danguí Oduber

Den un conferencia di prensa di dialuna ultimo, prome minister demisionario a informa cu Ministerio di Deporte y Enseñansa ta bay keda den man di minister Danguí Oduber pa loka ta keda di gobernacion di e gabinete demisionario aki.

Wever-Croes den un otro conferencia di prensa anterior a informa cu su persona lo a tuma e cartera aki temporalmente, esaki pa motibo cu parlamentarionan a tuma e decision di manda un minister cas.

“No ta asina facil un otro minister lo tuma su cartera. E traspaso di un cartera ta tuma hopi reorganizacion mirando cu e lo kita hopi tempo di e minister su cartera actual. Especialmente un cartera manera di Enseñansa y De-



porte, na unda cu e minister anterior a traha hopi duro y tin hopi trabou andando,” Wever-Croes a bisa.

Tambe, a splica cu na momento cu a retira Endy Croes, minister Xiomara Maduro tabata den exterior, y despues di a bolbe back Aruba, a sinta pa delibera cune, hunto cu minister Danguí Oduber y

minister Rocco Tjon. Despues di deliberacion, Consejo di Minister a bay di acuerdo pa minister Danguí Oduber tuma e cartera di Enseñansa y Deporte pa resto di e periodo di gobernacion.

“Mi ta lamenta si cu politiconan oponente a probecha di e situacion aki pa desacreditar mi persona y ministerraad



completo. Nan a insinua cu mi persona a tuma e cartera aki pa mi yuda un persona cu ta den investigacion, y pa mi interferi den dicho investigacion.

E realidad ta cu berdad tin un investigacion andando den Stichting Sports Subsidie Aruba (SSA), pero mesora cu e investigacion aki a cuminsa, e director a ser retira.” Asina mes a declara cu SSA a

haci nan investigacion y awor tur cos ta den man di Ministerio Publico (OM). “E ta tristo si pa wak con oponentan politico asisti pa cierto miembro di prensa ta prefera di desacreditar un persona en bes di busca e berdad. Mi ta reitera, ami no ta, y ami no por mete den investigacionnan di OM,” Wever-Croes a expresa.